

兵

鏡

Auteur : Wu Zi ( 吳 子 )

Titre en langue originale : « 兵 鏡 » ( abrégé de : « 兵鏡吳子十三篇綱目 » )

Titre en chinois : « Bing Jing »

Titre en japonais : « Hei Kyô »

Titre en français : « Le miroir de la guerre »

Titre en anglais : « The Mirror of War » / « The Soldier Mirror »

Année : Alentours de 1620

Le « Bing Jing » est une grande encyclopédie militaire de la Chine traditionnelle, couvrant tous les aspects de l'art de la guerre en 20 volumes, rassemblés au sein de 12 cahiers.

Vous trouverez ici l'intégralité de ces 20 volumes, scannés page par page.



兵鏡卷之十八

新都

吳惟順長卿父

吳鳴球玉宣父

編輯

同宗吳之奇汝才父較正

天時

天時者。兵家之主也。若夫星辰變見。雲氣聚散。六壬旺相。遁甲休咎。風露雷雨之所動作。陰陽晦明之所啟閉。輦鼓之震响。禽鳥之示情。通天地鬼神之心。開勝敗休咎之兆者。其道何也。竊謂天地之道大正也。

六陽爲實陰爲虛實有常而虛不常也法具實者政令之謂也政令一定之象也法具虛者權智之謂也權智應變之象也動以虛實爲用者天地之正道也是以知政令權智之所設能應於天地者此之謂大順也或天地示其災變我以順應之示其吉祥亦以順應之是以順應正也如能以順應正行師豈有敗乎然雖黑氣出壘赤氣臨軍而六窮起風三形生霧皆爲敗象當其時苟能觀其凶變修政謹身卜地遷營應天揆日恭受譴戒而警省焉此可以易凶爲吉矣斯乃以順道應天者也今所列時日雲氣曆象之



門。其占候既不一。在乎用兵者因其時擇而用之耳。若能善服人心。以順天地之情。和陰陽之性。使災咎不見。率由政令。權智之得其道也。又何假審占天時以爲候哉。

### 天占

天裂 劉向曰。天裂陽不足。地動陰有餘。武密曰。天裂者。主地欲分裂。

天鳴 五行傳曰。天鳴有聲。萬姓勞形。

晉元帝大興二年。八月戊戌。天鳴東南。有聲如角。雨血。五行傳曰。天雨血。是謂天妖。不出三年。當有

兵起

雨石 甘德曰天雨石墜地大可一尺或如鷄子兩

頭尖銳名曰天鼓所下之邦必有大戰伏尸

隋開皇七年五月己卯雨石于武安淦陽間十里

雨草 五行傳曰君恡爵祿厭妖天雨草 京房曰

火失其性則有草妖其歲民兵死

雨魚 五行傳曰天雨魚國有兵魚本于水天雨者

水失其性漢成帝時天雨魚

雨鱉 甲兵之象主國有兵

雨毛 五行傳曰金失其性則天雨毛



隋開皇六年。京師天雨毛。如馬尾。長者二尺餘。短者五六寸。其月梁士彥等謀反。伏誅。明年發十萬人築長城。役賦繁興。兵革不息。

雨骨 五行傳曰。天雨骨。是謂陽消。五者德喪。政令不行。主有內兵。

梁惠成王八年。大雨骨于赤鞮。其後國饑。兵役並起。

雨金 五行傳曰。天雨金鉄。是謂刑餘。國君殘酷。好殺無辜。不出一年。主有兵災。

秦獻公十八年。雨金櫟陽。二十一年。與晉戰于石

門斬首六萬級。隋文帝仁壽四年。諸州造舍利塔。時陝州天雨金銀花。人以為佛家祥瑞。卒有漢王諒之亂。

雨灰 五行傳曰。上暴虐無道。則天雨灰。

梁武帝大同三年。天下雨灰。色黃。終有侯景之亂。雨水銀 五行傳曰。天雨水銀。兵將興。君昏臣佞。故水失其性也。

雨金 五行傳曰。天雨金。人相食。

春秋晉惠公二年。天雨金。至六年。秦穆公伐晉。是歲饑荒。人民相食。



雨木冰 劉歆以爲上陽施不下通下陰施不上達  
故雨而木爲之冰。霧氣寒木不曲直也。 劉向以  
爲冰者陰之盛而冰滯者也。木者少陽貴臣卿大  
夫之象也。此人將有害則陰氣脅木。木先寒故得  
雨而冰也。今之長老名木冰爲木介。介者甲。甲兵  
象也。

雨膏如蟲 主將帥敗

雨絮 主有兵

雨墨 多陰謀

雨物并人 所見者皆主大兵

雨穀麥豆等類

巨候民災多寇兵起所見者糴貴

不三年主換

倉雲經天

五行傳曰蒼雲經天下有拔城

後周武帝天祐六年正月丁卯夜有蒼雲廣三丈許經天自以爲賀後齊國公憲拔其新築五城

無雲而雨

五行傳曰雨者從龍而作無雲而雨則

世多災

無雲而雷

五行解曰雷者天鼓也無雲而雷當有

暴兵

非時而雷

五行傳曰非時而雷者賊臣起也



當雷不雷

雷聲不發。君失威武也。

非時降雪

五行傳曰。雨陰也。雪又雨之陰也。出非

其時。迫近之象。

京房易傳曰。夏雪。賊臣爲亂。

大霧

五行傳曰。霧者百邪之氣。陰來冒陽。邪臣謀

上擅竊主威。

李淳風曰。霧氣不順。爲陰陽錯亂。

積陰不解。天下分離。

晝夜陰晦

五行傳曰。天晝夜陰晦。下有陰謀。

漢夏侯勝曰。皇之不

厥。罰常陰。天久陰不雨。下

必有謀上者。昌邑王果被霍光所廢。

星人

星墜。爲人言善惡如其言。

地古

地震 五行傳曰。地者積陰主靜。若震動者。陽伏而不能出。陰迫而不能入。陰陽相擊。地故震動。李國曰。地陰也。法當安靜。小人越陰之職。專陽之政。故應以震。又曰。陰背陽。則地裂。羌夷叛。地動。陰有餘。皆下之疆盛。

地裂 五行傳曰。地折裂者。士庶分離。若裂而有聲。天下不寧。四方兵動。其主失國。河圖秘徵篇曰。地之裂。有臣叛。

名謀 岑彭伐蜀。去城都數十里下營。有地名彭亡。



聞之欲移營。會日暮。是夜彭爲公孫述刺客所殺。  
魏太祖圍呂布。布將睦固屯兵射犬。有巫誡之曰。  
將軍字白兔。而邑名射犬。兔見犬必驚。宜急去。固  
不從。明日戰死。

山鳴 山鳴天下大亂。

### 五行占

經曰五行。一曰水。二曰火。三曰木。四曰金。五曰土。水  
曰潤下。火曰炎上。木曰曲直。言可揉而曲也金曰從革。革更也可土爰稼穡。穡更銷鑄也可種曰稼。收曰穡。

### 木行

傳曰田獵不宿不預戒曰不宿飲食不享不行享獻

出入不節奪民農時及有姦謀則木不曲直姦謀增賦履也

之事也即下所謂作說曰木東方也於易地上之水

為觀故云地上之木也其于王事威儀容貌亦可

觀者也故行步有佩玉之度登車有和鸞之節田狩

有三驅之制飲食有享獻之禮出入有名使民以時

務在勸農桑謀在安百姓如此則木得其性矣若乃

田獵馳騁不反宮室飲食沈湎不顧法度妄興繇役

以奪民時作為姦詐以傷民財則木失其性矣蓋工

匠之為輪矢者多傷敗揉輪不曲矯及木為變柱



更生及變爲人形是也。是爲木不曲直。

木非時枯落。是爲金刑木。不出三年。有暴兵從外國來。枯木冬生。是謂陰陽易位。木生一夜盈尺。凶。木卒生道中。忽自鳴作金聲。地將分裂。軍壘中草木自死。凶。軍中地忽生五穀。一軍受賞。天助之兆。

### 火行

傳曰。棄法律。逐功臣。殺太子。以妾爲妻。則火不炎上。說曰。火南方。揚光輝。爲明考也。其于王者。南面鄉明而治。書云。知人則哲。能官人。故堯舜舉群賢而命之。

則意曰。佞而放諸壘。孔子曰。浸潤之譖。膚受之愬。不行焉。可謂明矣。賢佞分別。官人有序。帥由舊章。敬重功勲。殊別嫡庶。如此則火得其性矣。若乃信道不篤。或熒虛僞。讒夫昌。邪勝正。則火失其性矣。自上而降。及濫炎妄起。災宗廟。燒宮館。雖興師衆。弗能救也。是爲火不炎上。

星墜爲赤鳥。有兵。赤鳥飛入營府。其軍將去。

土行

傳曰。治宮室。飾臺榭。內淫亂。犯親戚。侮父兄。則稼穡不成。說曰。土中央。生萬物者也。其于王者爲內事。宮



室夫婦親屬亦相生者也。古者天子諸侯宮廟大小高卑有制。后夫人媵妾多少進退有度。九族親疎長幼有序。孔子曰。禮與其奢也寧儉。故禹卑宮室。文王刑于寡妻。此聖人之所以昭教化也。如此則土得其性矣。若廼奢淫驕慢。則土失其性。有水旱之災。而草木百穀不熟。是爲稼穡不成。

石自移。主分野亂。軍中地生礮石。其地吉。可久居。養士卒。小兒里巷戲。以土自壅。是謂熒惑不守。一年有兵攻城。小兒聚土爲城。有兵起。小兒以土壅車轍者。四夷侵擾。國城郭門府寺門無故自開。

不出三年。兵從城郭起。凡城邑門及人家門戶。忽夜鳴者。有兵。

### 金行

傳曰。好戰攻。輕百姓。飾城郭。侵邊境。則金不從革。說曰。金西方。萬物既成。殺氣之始也。故立秋而鷹隼擊。秋分而微霜降。其於王事。出軍行師。把旄杖鉞。誓士衆。抗威武。所以征畔逆。止暴亂也。詩云。有虔秉鉞。如火烈烈。又曰。載戢干戈。載櫜弓矢。動靜應誼。說以犯難。民忘其死。如此。則金得其性矣。若乃貪欲恣睢。務立威勝。不重民命。則金失其性。蓋工冶鑄金鐵。金鐵



凝滯汨堅不成者衆。及爲變恠。是爲金不從革。  
星墜爲金鐵。天下有兵。鍾鼓自鳴。不出三年有兵。  
金鼓鳴將有功。刀自鳴。兼出血戰勝。戈戟鋒  
有火光。主兵。軍中金鳴將有功。

### 水行

傳曰。簡宗廟不禱祠。廢祭祀。逆天時。則水不潤下。說  
曰。水北方。終藏萬物者也。其於人道。命終而形藏。精  
神放越。聖人爲之。宗廟以收魂氣。春秋祭祀。以終孝  
道。王者卽位。必郊祀天地。禱祈神祇。望秩山川。懷柔  
百神。罔不宗事。慎其齋戒。致其嚴敬。鬼神歆饗。多獲

補助此聖王所以順事陰氣和神人也至發號施令亦奉天時十二月咸得其氣則陰陽調而終始成如此則水得其性矣若乃不敬鬼神政令逆時則水失其性霧水暴出百川逆溢壞鄉邑溺人民及淫雨傷稼穡是爲水不潤下

星墜於水有兵 陂澤忽自竭主城邑虛 秋水漲江臣下有憂主兵起 井忽自沸溢或濁及有聲主將帥亡 井中氣直上兵起

### 太陽占

日旁雲氣 雲氣近日黃潤皆爲吉祥。日黃光大



旁有雲氣經抱者。當有鄰國臣佐來降。日有一  
珥者。李淳風曰。爲喜。兩軍相當。軍欲和解。所歸者  
喜。日有二黃人守日中。李經雌雄圖曰。外國人  
來降。日有戴氣者。瑞意圖曰。人君德至于天。則  
日有戴氣。戴有德也。國有喜。日有纓氣者。謂氣  
小而在日下。出向上者。爲纓。晉書天文志曰。得地  
爲喜。日有負氣者。謂氣小如半暈狀。在日上。爲  
負。晉書天文志曰。得地爲喜。日有承氣者。謂氣  
如半暈。在日下。名曰承氣。晉書天文志曰。承者。臣  
承君之象也。日下有黃氣。三重若抱。名曰福人。

生有喜得地。天立總論曰赤氣如布席掩日大  
戰。白氣如席萬人戰。黑氣如龍來御日。及如  
人卧背日旁者下有叛臣。白虹貫日其下有謀  
亂者赤氣尤甚。氣如青蛇貫日主疾疫。氣如  
白蛇貫日起兵。氣如赤蛇貫日主叛臣。氣如  
黃蛇貫日下有交兵。氣如黑蛇貫日有雨水  
氣如人頭旌旗皆爲有兵流血。日出入有黑雲  
貫之不出三日有暴雨。日中有雲如人狀其下  
有叛臣。日旁有赤雲曲如車輪此名曰日提其  
下有兵亡地。有氣如青龍守日主有謀。赤氣



如牛守日。其下有兵。日下有氣如人垂衣。天子之氣。如馬守日。若戰有兵傷。日旁有氣如蛇。其下有賊可防之。日旁有氣相交。穿貫於日。將不和。有破軍者。雲如赤鳥啄日。兵起。日旁有赤雲如相交。其下不宜先起兵。日下漠漠。氣如車馬馳走之狀。其下有破軍。日下有雲如虎躅者。大將反。日有青氣在上下者。吉可出軍。日下有氣如箭弩外向。軍出勇力。日旁有赤氣如冬木者。有兵客勝。日下有氣如人所持者。主其下臣叛。青雲扶日者。其分野臣下有謀。白雲

廣二尺在日左右其分野有兵起國憂。日上下有黑雲如蛇龍者主風雨。日出有黑雲如隔主其下有兵有雨卽解之。日始出有雲如車蓋必雨。日出沒時有黑氣橫截之主驚恐。三日內有雨則解。日旁有赤雲兩端銳其下不宜先舉兵。赤雲如雄鷄在日上不出三月其下分野有兵。赤雲扶日其下有兵起失地。赤雲掩日其下戰亡地。赤白青黃氣刺日其分野有兵。日下有雲如青赤馬者主敵人相謀宜警備之。有赤雲如鳥夾日而飛其分野憂。有氣在日旁去疾



者軍無功。停半日者小勝。終日者大勝。赤雲如虹與日俱出。所臨國分野有兵。

日暈 甘德曰。日暈七日。無風雨。主兵。日暈而不冠天下。有立侯王。日暈而珥。主有謀軍在外。日有交暈貫日者。其下當破軍死將。日有交暈抱日者。有爭暈先衰後盛者敗。日暈有氣如人居暈中。不出三日。寇入城。日暈不合。有雲如人在暈外。似相就者。不勝。京房曰。日暈有兵在外客勝。日暈而明。有兵兵罷。無兵兵起。日有黃暈。主風雨時國安。日有黑暈。災在用事臣。日

兩旁飛暈不合。主謀不成。日上有半暈如鼎蓋。  
有欲請和親者。日有半暈兩角銳者。有戰必勝。  
日有半暈再重。主國民蕃息。歲太和。以日宿占  
分野。日暈再重。有德之君得天下。日有青暈  
再重。其下有兵殺貴。日有赤暈再重。其災在下。  
所見之國。蝗旱多盜。日有黃暈再重。其災在下。  
歲中兵起。日有白暈再重。所見之國多風雨。百  
姓不安。有兵殺貴。日有黑暈再重。不出三年。其  
下大水。民流散。日暈有赤雲如車輪。凹向日爲  
內提。內臣叛其主。凸背向日爲外提。外臣叛其主。



背氣在暈。中青外赤。臣背主命。日暈上下有兩背。無兵。兵起。有兵。兵罷。日暈有衆雲如毛羽。臨日不去。其下國有憂。李經雄圖曰。日暈庚辛。將帥不利。夏氏占曰。日有半暈一背。瑒臣有邪謀不成。日暈中見馬。軍敗期三年。日暈瑒兩背。瑒在暈外。臣叛。日暈有直瑒爲破軍。貫中爲殺將。日暈重暈中有兩瑒。有叛徒兵起不成。日暈有四背。瑒在暈中。臣不和。四背瑒在暈外。臣叛。日暈外有一直暈。外臣欲自立。其色中青外赤不成。日暈有三直氣。有謀者不成。日

暈有虹貫從虹所貫戰勝。日暈有聚雲在外不出三日圍城。日去者兵起。又云聚雲在外不出三日圍城。日暈有青雲貫有圍城。日暈有赤氣如戟臨之。兵起。高宗占曰。日有方暈二背。將敗民散。日暈有兩直氣有叛臣。日暈有四銳氣如鋒四出者。其下亡地。日暈氣如蛇。大軍憂。天下總論曰。日有重暈有立王者。日暈三重主兵起。有赤雲貫之其下失地。日暈有四重敗於野。其下有叛臣。一日攻城圍邑不拔軍敗。日暈五重。不出一。年主兵。日暈六重。其下國失政憂兵。日暈七



重主茂狄強盛。日暈八重民亂軍憂。日暈九重主歲荒夷人交侵。日暈十重天下喪亂不期年大凶各以星宿辰及日辰占之。

日並出 武密曰兩日並出天下用兵無道者亡。

又曰兩軍相當數日並出有大戰拔城各以分野言之。

日闕 武密曰兩日相闕其下國亂。

日隕地 其下失政。

日中見鳥 主其下國分。若是三足鳥見其地受殃。出軍遇之軍敗。

日中黑子黑氣 河圖占曰日中黑氣日薄也凡日蝕皆於晦朔者爲日薄雖非日月同宿時陰氣盛掩日光也其占類日蝕。

日無光 京房易傳曰日出東方二竿停停無光曰日病日未入西方二竿停停無光曰日死占云日病日死其地分王侯災 又云奸臣盛則日晝昧甘德曰日無光晝昏到暮不鮮有大水 日失光所臨之國不昌又主臣逆君。

日赤 日赤如赭色大將軍野戰 感精符曰日赤如火炭主兵急 考靈異曰日有赤足有舉兵者。



郝萌曰。日有赤足。則其國謀叛。武密曰。赤日如血。主其下君憂臣背。灾癘盜賊並起。

日夜出 廣古占曰。日夜出。主兵起。

日生牙 廣古占曰。日生牙。其下有賊臣。欲相殘害。

虹白氣貫日 天文志曰。虹貫日。諸侯有叛。白氣貫日。主其下君憂。

日蝕 日蝕皆從西缺。若中央黑。名曰黑子。日蝕者。陰氣盛。陽不克也。夏氏占曰。日蝕而出軍者。軍傷亡。後有疾病。有軍必戰。日蝕而從中者。內有伏謀。色青則謀者止。色赤則其事成。色黃則謀者

詩。色白則真。事覺。色黑則逆。謀成。李淳風占曰。日始出而蝕。有兵失地。日午時已後蝕者。有兵兵罷。日蝕而暈珥。白雲來去掩映。主兵起。日蝕而旁有雲。似兔如鹿守之者。不出期年。其分野兵起。凡秋有日蝕者。兵戰客勝。八月日蝕。兵起。京房占曰。若十二月日蝕。主有兵。日蝕既夷。兵起。既者盡也。當嚴號令以正其災。日以甲乙日。有二珥四珥而蝕。有白雲從中出。有兵。日以丙丁日。有二珥四珥而蝕。有黑雲從中出。兵起。疾。日以戊巳日。有二珥四珥而蝕。有雲從中出。



有兵。庚辛壬癸日不占兵。武客曰。日蝕大寒者夷兵動。行軍占曰。日從下蝕。將有憂。凡日蝕從虧處擊之勝。

### 太陰占

月有戴氣不出百日。人上有憂。月終歲不暈。主天下偃兵。隣國來和。月下有氣如人相隨者。是謂惡成。其下分野侯王主之。月中有如人行者。有兩主爭。客勝。有赤雲黑雲相交臨月。當其國有亡軍。月旁有白雲大如杵抵月者。期六十日外有戰。破軍死將。若月旁多赤雲如人頭。大戰多白

爲兵勝。多黑爲兵敗。月旁有白雲一。黑雲二。蒼雲三。其大如厚布。抵月貫月。圍城拔邑。月始生而復沒者。亂。月角各一星。有軍在外者。敗。月生仄。其下軍憂。河圖帝覽嬉曰。月有兩珥。國喜。兵在外勝。月有四珥。主喜。月大而無光。其城不降。月小而無光。其城降。月始出時。有雲居其中。似禽獸狀。甲乙日見。東方受其害。丙丁日見。南方受其害。戊巳日見。中央受其害。庚辛日見。西方受其害。壬癸日見。北方受其害。天文總論曰。月暈無光。是謂大盈。其下有兵王者。以德令除之。無



咎。星入月中。其下起兵。破軍殺將。武客曰。白虹貫月。大兵將起。主野戰。春秋運斗樞曰。月垂芒刺。國昏亂。其地弱。春秋曰。月赤足。臣有過。考異郵曰。諸侯謀叛。則月生足。高宗占曰。月晝明。陰國兵強。

珥背璫。河圖帝覽嬉曰。凡月暈而珥。六十日兵起。不暈而珥。有喜。兵在外亦喜。月珥青赤。有兵。黃有喜。白有喪。黑失地。皆期以三年。月不暈而有四璫者。臣下有謀不成。高宗占曰。月有兩珥。三珥者。主國喜。荊州占曰。月昏而珥者。有半喜。夜

半而珥者邊地有恐。

月珥且戴不出百日。主喜。

李淳風曰。月有抱珥在暈外赤者。外人勝。武

客曰。月有白珥其下城降。

春秋感精符曰。月有

背珥臣下弛縱欲相殘賊。

月暈 李淳風曰。經歲不暈。天下平。河圖帝覽嬉

曰。暈再重。大風起。暈三重。主兵。暈四重。其下亡國。

五重。貴女憂。六重。其國失政。七重。其下易主。八重。

其下國亡。九重。其下起兵流血亡地。月暈有蜺

雲垂之。有戰從蜺所擊者。大勝。月暈有雲如厚

布。若三若四貫月者。以戰勿當。當者破軍。荊州



占曰孟月十一日。仲月八日。季月九日。皆當月有  
暈。若不暈。不出三日。主暴風雨。一月五暈至九  
暈者。失地。月暈如連環。有白虹於外。不及月者。  
主女人陰謀。月暈有雲橫貫之。起兵者勝。月  
暈三重赤雲貫之。其下國亡。月暈有光。主兵降。  
高宗占曰。月交暈赤光。其國不二年遇兵。月  
暈多白氣。從外入城。攻城拔得大將。月暈再重。  
皆在外者。私成於外。背在內者。私成於內。月暈  
不合外者。四背。外有謀不成。武密曰。軍在外。  
月暈者。主戰勝。一白光起者。戰勝。月春暈歲星。

夏暈熒惑秋暈太白冬暈辰星四季暈填星皆主其下有兵。月暈五星各以分野言之。五星色不明主勝五星色明客勝。

月蝕 河圖帝覽嬉曰所宿國其下有大戰拔城。

兵在內而月蝕者其國受殃。兵未起而月蝕者所當之國兵戰不勝。月滿而蝕者兩國相當若無兵主將死於野。月蝕從上始謂之失道國君當之月蝕從旁始謂之失令相臣當之月蝕從下始謂之失法將軍當之。月春蝕東方夏蝕南方秋蝕西方冬蝕北方其下軍憂。月犯熒惑而蝕



者其下破軍亡地。大將憂。近一年。遠三年。夏氏  
占曰。月蝕東方。其月惡風。月蝕西方。主兵利。  
荊州占曰。月蝕有大戰。破軍死將。拔邑亡地。月  
蝕不盡。軍破將憂。月蝕青色。五穀貴。月蝕赤  
色。宜利客兵。不出一年。月蝕黃色。有立諸侯國  
王者。月蝕白色。其國失地。或有喪。月蝕黑者。羅  
貴。各以其下宿國占之。月已蝕而青者。爲憂。  
月已蝕而赤者。爲兵。月已蝕而黃者。爲財。月  
已蝕而白者。爲喪。月已蝕而黑者。爲水。月秋蝕  
西方起兵。月暈歲星而蝕者。天下大戰。月暈太

白而蝕者其國兵強若戰大將有二心。巫咸曰。  
月犯填星而蝕者主將亡功。武客占曰。軍在外。  
月蝕自下而上者將軍當之。月蝕而聞有軍必。  
戰無軍兵起。隨所蝕戰利。兩月並蝕天下亂。  
月蝕有氣從外來入月中者主憂。氣從中出者客。  
憂。氣從南行南軍憂。東西北亦然。氣所向者敗。  
月蝕後三日有雨則事解。月蝕有彗星入月者。  
其下有兵。

陵犯雜占

月犯歲星 宿國民饑流散。主邊兵。晉書曰。月蝕。



歲星其宿國有兵叛逆之象。月與歲星同宿而蝕  
粟貴

月犯熒惑 巫咸曰熒惑與月同光其月月蝕有叛  
臣民饑 月犯熒惑小戰 河圖帝覽嬉曰熒惑

八月中憂在內非兵乃盜 熒惑入月中有兵以

戰不勝 京房易傳曰月與熒惑會其宿國主死

海中占曰月與熒惑合其宿國亂起兵 月犯

熒惑戰勝之國大將死 月齧熒惑其師破敗

天官書曰月蝕熒惑其國地亂

月犯填星 巫咸曰填星與月同光其月月蝕若星

挂徒其下亡地。 荊州占曰。月與填星合。其下國  
饑。先舉事者敗。 月暈填星不明。主勝。星明客勝。  
天文志曰。月蝕填星。民流千里。 高宗占曰。月  
暈填星所在之國。兵起不勝。 河圖帝覽嬉曰。月  
暈填星所守之國。有德。

月犯太白。 天文錄曰。太白與月同光。其月月蝕。其  
下有兵。 荊州占曰。月與太白皆出。有城守不宜  
更城守吉。 太白蝕月暈出。主將死。 月暈太白  
星入暈月中者。星色不明。則客敗。星色明而有角。  
客勝。 太白與月並明。主大戰。相去五寸。有城。



二寸憂兵。太白與月合。其分野主憂兵。月犯  
太白。天下民靡散。月戴太白。有卒兵。期五日。  
入月三日。太白失行而居月北。兵戰不勝。秋冬  
入月三日。太白出西方。居月北者強。居月南者弱。  
入月三日。刺太白。陽大邑拔。陰小邑驅掠。出南  
方爲陽。北方爲陰。海中占曰。太白居月中無光。  
各月蝕太白。強國君死。太白有光。名太白蝕月。  
臣叛主。期三年。太白出月右。陰國有謀。太白出  
月左。陽國有謀。天官書曰。月犯太白。強國以戰  
敗。邠萌曰。相去五寸。天下憂兵。又曰。太白入

月中國失政。河圖帝覽嬉曰。月犯太白。強侯作  
難戰不勝。太白貫月。不出六年。國有兵戰敗亡  
地。月暈太白。其分野受兵。戰不勝。所守之國兵  
起。太白入月中。將軍死。臣謀主不成。又曰。必  
有內惡。戰不勝。月與太白相遇者。月出其南陽  
國受兵。月出其北。陰國受兵。巫咸曰。月未盡三  
日。候太白出東方。在月北。中國不勝負海國勝。  
入月三日。候太白出西方。在月南。中國勝負海國  
不勝。天文總論曰。月未盡三日。候太白出東方。  
與月相并。舉指準之間。容一指。入月三日。有破軍。



死將主人不勝。容二指入月九日。軍政敗主亡地。  
容三指入月十五日。有破軍主亡地。容四指入月  
二十日。客軍大敗容五指入月二十五日。有兵不  
戰並出則占。不並出則不占。

月犯辰星 巫咸曰辰星與月同光其月月蝕 海  
中占日月與辰星相遇所合宿主雨水 河圖帝  
覽嬉曰辰星入月中臣欲叛 月與辰星合宿其  
國亡地 月犯辰星兵大起 月蝕辰星其國憂  
水饑兵未起而蝕所當之國戰不勝 荊州占曰  
辰星入月後出其國分野主死入而不出其國君

臣憂。又日月與辰合。所宿國兵起。海中占曰。月暈辰星。春主大旱。秋主大水。又兵起。

彗星犯月。海中占曰。彗星入月中。主兵大起。期十二年大饑。若彗星入月無光。不出期年。有亡國。荆州占曰。彗星貫月。有臣謀主。彗星在月上。有大兵起。將死。四夷來侵。

流星犯月。河圖帝覽嬉曰。流星入月中。無光有兵。有光亡國。荆州占曰。月暈有流星出。暈中青色。主憂。主城拔。黃色主益地。白色主豐熟。黑色主軍敗。



月犯列星 河圖帝覽嬉曰。列星貫月。陰國可伐。  
荊州占曰。月犯列星。其下有兵。月蝕列星不見  
者國亡。京房妖異占曰。月中有星。天下盜賊星  
多者盜賊多。荊州占曰。列星居月中不見。其國  
饑。其國以二十八宿所屬十二分野而言之。

日辰占

日月五星二十八宿。凡諸災變。藉日辰以辨之。有歲  
有月。有日。有時。所主吉凶在焉。

甲爲齊

乙爲東夷

丙爲楚

丁爲江淮南蠻

戊爲中國

巳爲韓魏

庚爲秦

辛爲華山以西西夷之地

壬爲燕趙

癸爲常山北北夷燕趙之國

子爲周

丑爲翟亦主遼東

寅爲趙楚

卯爲鄭

辰爲晉

巳爲衛

午爲秦

未爲中山梁宋

申爲齊晉魏

酉爲魯

戌爲趙

亥爲燕代

歲月日辰時及見災臨所在之地皆同用也。假令丙



辰年七月丁卯日午時災見於未地太歲在丙爲楚  
辰爲晉七月申又爲鄭又午時爲秦災見未地復爲  
中山梁宋卽是其地各有災也他倣此。

### 五星占

歲星曰東方春木於人五常仁也五事貌也仁虧貌  
失逆春令傷木氣則罰見歲星歲星盈縮以其舍  
命國其星居位其國德厚五穀豐昌不可伐其對  
爲衝歲乃有殃歲星安靜中度吉盈縮失次其國  
有憂不可舉事用兵。

熒惑曰南方夏火禮也視也禮虧視失逆夏令傷火

氣罰見螢惑使行無常出則有兵入則兵散以舍  
命國有亂爲賊爲疾爲喪爲饑爲兵所居國受殃  
環繞鉤已芒角動搖變色乍前乍後乍左乍右其  
爲殃愈甚其南丈夫北女子喪其野亡地其失行  
而速兵聚其下順之戰勝

填星曰中央季夏土信也思也仁義禮智以信爲主  
貌言視聽以思爲正故四星皆失填乃爲之動動  
而盈侯王不寧縮有軍不利所居之宿國吉得地  
及女子有福不可伐去之失地而女憂居宿不移  
國有厚福



太白曰西方秋金義也言也義虧言失逆秋令傷金  
氣罰見太白太白進退以候兵高卑遲速靜躁見  
伏用兵皆象之吉其出西方失行夷狄敗出東方  
失行中國敗若經天是謂亂紀人衆流亡晝見與  
日爭明強國弱小國強女主昌

辰星曰北方冬水智也聽也智虧聽失逆冬令傷水  
氣罰見辰星辰星見則主刑主燕趙以北宰相之  
象亦爲殺伐之氣戰鬪之象又曰軍於野辰星爲  
偏將之象無軍爲刑事

凡五星木與金合有破軍火與金合爲燄爲喪不可



用兵金與水合爲北軍用兵舉事大敗火與水合  
爲焠不可舉事用兵土與水合爲壅沮不可舉事  
用兵與金合亡地與木合主饑水與金合爲變謀  
爲兵憂入太白中而上出破軍殺將客勝下出客  
亡地視旗所指以命破軍環繞太白若與火戰客  
勝。

凡水火土金與水闔皆爲戰兵不在外凡同舍爲合  
相陵爲闔二星相近其殃大相遠毋傷七寸以內  
忌之。

凡五星分天之中積於東方中國利積於西方外國



用兵者利。辰星不出太白爲客。其出太白爲主。出而與太白不相從。及各出一方爲格。野雖有軍。不戰。

凡五星見伏。留行順逆遲速。應歷度者爲得其行。政合于常。違歷錯度。而失路盈縮者爲亂行。亂行則爲天矢彗孛。而有亡國革政兵饑喪亂之禍。

凡五星合。是謂易行有德受慶。王者奄有四方。五星皆大其事亦大。皆小其事亦小。四星合。是謂大暋。其下兵喪並起。三星合。是謂警立絕行。其國外兵內喪。主饑。



填星太白辰星合宿爲國亡地戰不勝 歲星熒惑

同舍相去三尺相守七日至四十日其國外有叛

臣填星所在歲星從之伐者不利

天文總論曰太白辰星同日出於東方東方有兵同

日出於西方西方有兵 太白辰星俱出東方皆

赤而角瀕海之國大敗 太白辰星俱出西方皆

赤而角中國大敗 太白辰星色皆黑外國利辰

星色黑而出與太白不相從其野雖有軍不戰

辰星與太白相近出東方若二十日至三十日

不入東南國有軍不戰至春夏有兵 辰星與太



白不相近。出西方。二十日至三十日不入西方北  
國有兵。辰星與太白相近三四尺於西方。二十  
日至三十日有軍戰。辰相去遠不戰。辰星隨太  
白於東方。天下無兵。兵起期六十日。太白出辰  
星北。容利。太白出辰星南。主人利。若併出東方。  
利以西伐東。軍勝。若併出西方。利以東伐西。軍勝。  
太白辰星俱出東方。太白先出辰星後出。辰星  
上過太白而去。其下有背臣。不出一年。辰星過  
太白。間可容劔。小戰客勝。居太白前。上旬三日。軍  
罷。若出太白左。小戰壓太白右。有數萬人戰。主人



吏死。辰星來抵太白不去。將死。有旗出上破軍。  
將客勝。太白出東方。辰星居其前而不去。十五  
日若二十日而入陰國。兵威不大。戰客去。兵罷。  
辰星出西方。居太白前。十五日而入陽國。有兵。  
辰星在西方。居太白前。辰星入而兵罷。辰星在  
東方。居太白前。利主。辰星與太白俱在西方。居  
太白前。相近。其間可容劒。在西北。陰國有兵。在西  
南。陽國有兵。太白辰星在西南。南國之事。在西  
北。比國之事。在西中。則中國之事。太白辰星相  
遇。太白迫之。主人不利。太白出辰星之右。居其



前主人利。辰星入太白中五日而出。破軍殺將。客勝。不出。客亡地三百里。視旗所指以命破軍。辰星太白會爲兵爲變謀。辰星隨太白於西方。環繞若抵太白。居西北則陰國兵起。居西南則陽國兵起。期半年。太白自暈。天下有赦。其兵有喜。不出二十日。其國失兵。辰星自暈。有兵有水。太白辰星俱暈。而又雲掩熒惑。必有覆軍死將。二十八宿次舍占。

東方七宿七十四度

角宿二星十三度爲天關。其內天庭黃道經其中。七

曜之所行左爲天田主刑右爲將主兵。月暈左

角主兵左將軍憂。月暈右角主兵右將軍憂。

填星犯左角大戰。太白犯左角不可戰。

亢宿四星九度半。天子內朝也。月暈亢多雨。月

暈亢外有兵革之事。犯距星軍將死。歲星凌

犯有小兵。熒惑入亢主兵。太白入亢主邊兵。

氏宿四星十六度。四度二十分宋之分野王者之宿宮也。月

暈大將憂。月犯兵起。太白入氏主兵疫。辰星

守氏主兵。

房宿四星五度爲明堂。天子布政之宮。其四星四輔



也。下一星上將。次星次將。第三星次相。上星上相。中間爲天門黃道之所經。日暈主兵。月暈主大風。歲星太白守犯。將相憂。

心宿三星五度。天王正位。中星曰明堂。爲大辰。主天下賞罰。熒惑太白凌犯。戰不勝。填星守光明。赤黃主慶賜之事。

尾宿九星十七度。度八五十三公燕之分野后妃之府。太陰凌犯。陰國將軍死。日暈陰國弱。歲星守犯。主旱。太白犯之。人民不安。

箕宿四星十度。後宮妃后之府也。月從箕星。多風。

雨又主客蠻夷胡貊故蠻胡將動必先占此

蝕主疾風雨飛石折木

月暈西北兵不勝

月

蝕主饑車騎滿野

月并歲星犯守殺貴

北方七宿九十七度半二十五分

斗宿六星二十三度

九度九十二分吳之分野

丞相太宰之位亦

主兵一曰天機南二星天接庫也天梁也北二星

天府庭也

月暈大將刑

月凌犯占風雨之變

太白辰星犯守有兵

填星犯守臣下不軌

牛宿六星七度天之關梁一曰天鼓又上一星主道

路次星主關梁次三星主南粵動搖變色則占之



日暈陰國主死。

日月蝕兵起。

月凌犯大水。

填星居宿度三十日以上天下和平四夷來服。  
太白入主兵革。

女宿四星十一度

六度六十三分齊之分野

主婦之卑者太白犯

之布帛貴亦主兵。

虛宿二星十度二十五分半主北方城邑廟堂。

有

暈齊地主兵。

月暈主兵。

日月蝕軍旅饑。

歲

星入齊地饑。

危宿三星十八度

十五度六十分衛之分野

室宿二星十七度爲軍旅糧之府主二事一星爲官。

一星爲三軍之廩故置羽林之衛無芒角不動天  
下安 離宮六星在側日蝕衛地有憂 月蝕民  
乏食月暈蠻夷來 熒惑逆行凌犯臣下有謀主  
兵起 填星主關梁不通斧鉞用  
壁宿二星九度主文章 日暈風雨主大水

西方七宿八十二度半少

奎宿十六星十七度四度四分天之武庫一日天  
象又曰封豕所以禁暴橫也又主溝瀆 歲星守  
之北狄懷服 熒惑填星入分野凶

參宿三星十三度大爲天獄 月暈所守犯有兵在



外不戰。日蝕魯地。凶歲星守之。天下安。熒惑  
守犯主兵起。

胃宿三星十四度大。

六度三十一分趙之分野

天之藏庫。主食廩。

五穀府也。一日主誅捕殺。日暈。年穀不熟。月

蝕。將軍憂。月犯之。趙地兵。歲星犯之。五穀不

實。熒惑守之。早饑。填星留舍三月。客軍敗。

太白犯之。兵起。辰星犯之。吉。

昴宿七星十一度。天耳也。主西方畢昴間爲天街。黃

道之所經。七星皆黃。兵大起。星動若跳躍。胡兵

起。日暈。陰國胡主死。日蝕。臣下憂。月犯將

軍死胡不安。歲星乘昴出北陰國有憂。胡王死。熒惑守犯胡人病疫。填星守犯國安。太白守犯趙地旱。辰星主疫。

畢宿八星十六度

十度四十六分晉之分野

其星太白天高主邊

兵。日月暈蝕五星守犯主陰國憂胡王死。

觜宿三星一度爲軍之候行軍之府藏也主師旅敗

歛萬物。日暈陰國弱夷狄多疾疫。日蝕邊兵

憂。月犯主小戰。歲星熒惑填星辰星守犯魏地

兵起。

參宿十星九度少。一曰參伐。一曰鉞鉞主斬刈所以



斬伐萬物助陰也。日暈鮮卑死。又曰邊將憂  
月蝕。兵起晉地。熒惑犯之。兵火。填星太白辰  
星犯之。主兵。

南方七宿一百一十度大

井宿八星三十度。

一十度五十五分秦之分野

天之南門黃道之

所經。天之亭候。主水衡。法令所取平也。王者用法  
平。則明而端。列鉞一星。附井之前。主伺淫奢。不欲  
其明明與井齊。鉞斧用。日暈主風雨。日蝕秦地  
凶。月蝕年穀不登。月犯之。斧鉞用。歲星太  
白犯守。主秦地兵。辰星入井。在外星進。主兵星。

退守井若角動色赤主兵黑主水黃間主喜。五星犯井鉞悉爲兵災。

鬼宿五星二度大天目也主視明察好謀東北星主積布帛西南星主積金王隨變占之中央爲積尸。一曰鈇鎖主誅斬。鬼星明大五穀不成不明則民流鎖散。欲其忽忽不明明則起兵。日蝕月暈秦地有兵粟貴人民憂。填星熒犯之鎖用。太白辰星守犯主兵起犯積尸貴臣憂。

柳宿八星十四度少七度五十六分周之分野天之厨宰又注蓬。日暈主兵。月暈周地不安。填星守犯周地。



旱 太白辰星守犯主兵

星宿七星七度一名天都主兵急盜賊星明王道昌

日暈周地憂 月蝕其地饑 月犯守兵在外

戰主民饑 歲星守犯主盜賊起

張宿六星十八度

十六度七十一分楚之分野

主珍寶宗廟天厨

及賞賚之事 日暈將相憂 歲星入内外兵起

熒惑填星太白守犯主兵起 辰星主水

翼宿二十二星十九度少天之樂府又主夷狄遠客

負海之賓星明大則禮樂興四夷來動則夷狄使

來離徙則天下舉步 月暈主士卒逃遁 熒惑

太白辰星守兵起

軫宿四星十八度半

十二度十二分

主車騎凡軍出皆

占于軫

日蝕楚地災日暈楚地兵

熒惑填星

辰星太白犯守楚地兵起

諸星占

大角一星在攝提間赤爲兵

梗河三星在帝座北天矛也主矛鋒以備不虞一日

天鋒主胡兵

招搖一星在梗河北主胡兵占其星芒角變動則主  
兵革



天門二星在左角南。不見則大兵至。日暈天門。

梁不通。兵起。

庫樓十星在角宿南。爲天庫之府。其六大星庫也。南四星樓也。旁十五星三三而聚者。柱也。中央四小星衝星明大芒角。雲氣流星客星干犯則兵起。

折威七星在亢南。主斷軍獄。月犯折威。邊將有棄。

叛陣。車三星在氐南。天之華車也。金火守犯。

兵革滿野。

官二十七星在氐宿南。天子宿衛騎士之象。五星。

守犯。兵起。

騎陣將軍一星。騎將也。

車騎三星。在騎官南。總車騎之將。主部陣行列。

四咸四星。在房宿北。東咸四星。在心宿北。月日五星之道也。月犯東西咸。有陰謀事。五星犯。有兵起。

積卒十二星。在房宿西南。五營軍士之象。五星入。

守天下兵起。月犯天江。有兵強。河津不通。

天雞二星。在狗國北。金火入守。兵大起。

狗國四星。在建星東。主三韓鮮卑烏桓獫狁之屬。

五星守犯狗國。外夷有憂。火守東夷。兵起。

左右旗九星。在牽牛北。天之鼓旗爲旌表。主設險備。



知敵謀。

天壘地十三星形如貫索在哭泣南主鬼方北夷丁零匈奴類所以候興敗存亡。

斧鉞三星在八魁西北主行誅拒難斬伐姦謀星欲不明若明動皆爲斧鉞用。

北落師門一星在羽林星西南主北方蕃落亦主候兵壘。

壁陣十二星在室宿南是羽林之垣壘主天軍營陣五星入壘壁陣大兵起。

羽林四十五星三三而聚散在壘壁之南主天軍營

陣列衛之象。月犯羽林兵戈起。五星入羽林  
闕梁不通兵起。

天將軍十一星在婁宿北中央。主天之大將也。外  
星吏士也。動搖主兵起。旗直揚者隨所擊勝。

左右更五星在婁宿西。秦爵名也。主牧師之官。牧養  
牛馬之屬。金火犯守左右更。山澤有兵起。

天街二星在昴畢間。爲陰陽之所分。月犯天街兵  
塞道路。金火犯守兵起。

參旗九星在參宿西。天子也。弓弩之候。如弓張則兵  
起。旗星偃曲也。五星犯參旗主兵起。弓弩用。



狼一星在參東南爲野將主侵掠。

弧矢九星在狼星東南天子也主行陰謀以備盜賊常屬矢而向狼。

凡諸星不言兵者不具之皆以星名所主占之雲氣彗孛客星流星有干紀諸星以其五色星名分野言其禍福。

### 星變占

景星 傳曰景星者德星也。符瑞圖曰景星者大星也狀如半月生於晦朔助月爲明。巫成曰景星見其國昌文士出。

周伯星

晉書曰周伯星黃色煌然所見之國大昌

含譽星

孝經援神契曰含譽光曜似彗其國喜則

含譽射之變夷奉貢則含譽射之

天保星

晉書曰天保星者流星之類有音如炬火

下野雉鳴天保也所墜之國有喜隋開皇元年

十一月己巳有流星如炬火燭地占曰流星有聲

者名曰天保所墜之處其國有喜後九年陳平天

下一統

妖星十三條

天棓星

傳曰天棓一名覺星本類彗星未銳長四



丈或出東北方。主奮爭。運斗樞曰。彗星出東方。名天棊。耳德曰。天棊出其國凶。不可舉事用兵。必有破軍拔城。天官書曰。歲星失次。進而東北。三月。主天棊長四尺餘。主鈇鉞動。

蚩尤旗星。傳曰。蚩尤旗類彗而後曲。象旗或曰。赤雲獨見。或曰。其色上黃下白。所見之方。下有兵大起。天官書曰。蚩尤旗見。則王者討罰四方。孟康曰。蚩尤旗者。熒惑之積也。唐中宗景龍二年七月。有赤氣亘天。其光燭地。經三日不見。占曰。蚩尤旗也。主暴兵。十一月庚辛。突厥首領娑葛犯塞。

國皇星

傳曰國皇大而赤類南極老人星或曰去

地三丈如炬火主內寇內難或曰其下兵起兵強或曰內外有兵春秋考異郵曰國皇見東南兵起。

照明星

天官書曰照明星大而白無角乍上乍下

所出國起兵大變孟康曰照明星形如三尺機機上有九彗上向熒惑之積也。

司危星

天官書曰司危如太白有角或曰出西方

之野星去地可六丈大而白司危出其下主兵衡不利孟康曰星大而有毛兩角熒惑之積也。



天譏星 巫咸曰彗出西北如劍長可四五丈名天譏。運斗樞曰彗出西如劍長可四丈名曰天譏。見則兵起。

五殘星 巫咸曰五殘星出東方星狀類辰星可去地六七丈。春秋合城圖曰蒼彗散爲五殘如辰星出角五殘者五分也爲毀敗之兆。荊州占曰大而赤類動察之而青爲五殘見則兵起。

六賊星 巫咸曰六賊星出正南方其星去地六丈大而赤動有光。天官書曰六賊星所出非其方皆爲其下主兵衡不利。

天鋒星 宋均曰天鋒彗象而形似矛鋒若見則天下兵起。

長庚星 天官書曰長庚如一疋布著天見兵起。  
柱矢星 晉書曰柱矢類流星色蒼黑蛇行望之如  
有毛角長數丈見則謀反之兵合射所誅亦爲以  
亂伐亂 又曰柱矢黑軍士不勇 漢書曰秦兵  
亡項羽救鉅鹿柱矢西流矢所觸天下之所伐射。  
滅亡象也物莫直於矢令蛇行不能直枉而不正  
以象項羽執正亂也。

天狗星 巫咸曰天狗狀如犬奔星色黃有聲其



地類狗。所墜望之如火。光焰衝天。其上銳。其下圓。如數頃田。孟康曰。星有毛。旁有短彗。下有狗形。郗萌曰。星出其狀。色赤白有光。下卽爲天狗。荆州占曰。流星有光。見人面墜。無音。若有足。名天狗。其色白。其中黃。如逸犬狀。主候兵討賊。破軍殺將。

營頭星 司馬彪曰。營頭星者。有雲如壞山墜。所謂營頭之星。所墜其下。覆軍流血千里。一日流星晝隕。爲營頭。

客星

天文總論曰客星者非其常有偶見於天此天皇大帝之使以告休咎也。一曰客星見無常所或出西或守東日多者事大而禍深日少者事微而禍淺或見而變色芒角必有謀殺之兆其色微小卽有陰謀兵亂之事各有星色占之色白者其分野兵起有芒角者其下破軍殺將侵城奪邑。魏文

帝黃初三年九月甲辰客星見太微左門內占曰客星出太微國有兵十月帝南討孫權是後累有兵殺。

流星



流星天之使也。自上而降曰流，自下而升曰飛。大者曰奔奔，亦流星也。星大者使大星，小者使小星。聲隆隆者怒之象也。行疾者期速，行遲者期緩。大而無光者衆人之事，小而無光者貴人之事。大而無光者其人貴且衆也。乍明且滅者成敗也。前大後小者恐憂也。前小後大者喜事也。蛇行者姦也。往疾者往而不返也。長者其事長久也。短者事疾也。流星所墜其下有兵。無風雲有流星見良久間乃入爲大風發屋折木。小流星數百四面行者衆庶移流之象。流星如甕大者爲有發謀起事。



凡圍城而有流星來往過城或墜城內營壘之中者軍旅敗散之象。流星從彼敵出來吾軍止必當有間諜來說吾士卒夜半或寅時使至流星有流不止者不出百八十日動衆離散若墜吾軍營中大凶可以速退軍避之一云易將而禳之。流星色青赤名曰地鴈其所墜者起兵。流星有光青赤長二三丈名曰天鴈陣中之精華也其國起兵將軍當從星之所向吉。流星有芒或有聲。天文論曰此爲怒氣各以分野占之色青爲憂爲饑赤爲兵馬旱黃爲喜爲上功之事白爲兵爲刑。



罰里爲疾疫爲死爲水災。先看休王而占之。各以  
日辰宿分所屬之國分野論之。流星有光尾狀  
如疋布蒼白色爲使色。赤論兵。色黑論死喪。流  
星甚大其光照地。色青赤流四旁者。五穀不登。  
流星犯日。映日而赤色。向日而流者。天下不安。  
唐太宗大曆二年九月乙丑。晝有流星從午沒丑。  
潯桂州山僚陷州城。逐刺史。衆流星者。陰陽之  
精五行之氣。形體在下。精耀在上。衆星流者。萬人  
不安之象。凡衆星並流。將軍舉兵。隨流星所向擊  
之勝。後魏文帝和平元年三月。有流星數千萬。



西行三年六月詔將軍陸真討雍州叛民破之。

流星犯歲星 天文總論曰其地辱主。

流星犯熒惑 天文總論曰流星衝熒惑其下君有

福慶若光映熒惑者鄰國有姦謀之意宜謹防之。

流星犯填星 天文總論曰外邦有姦人入國 流

星來衝填星其填星光潤其分野有福 流星犯

填星而色赤其分野有兵色黑其分野有水。

流星犯太白 天文總論曰流星來犯太白其分野

軍弱無兵起兵 流星來衝太白太白無光其軍

師有憂 流星潤澤前後有光而銳來穿太白其



下君有德令盛行外若有軍卽還。

飛星

天文總論曰。飛星類流星。自下而上曰飛星。

晉書曰。飛星大如缶。或有星如甕。復皎然白。前卑後高。此謂頻頑。其所從者多死亡。

奔星

天文總論曰。有大流星曰奔。其星所墜。其下

有大兵。光跡相連曰流。絕跡而走曰奔。

隕星

天文總論曰。隕星如雨。有兵亂起。

彗星

傳曰。彗星所以除穢布新也。晉書曰。彗星

所謂掃星。本類星。末類彗。小者類數寸長。或亘天見。則兵起。火水掃除也。除舊布新。有五色。各依五

行本精所生。按彗無光，假日而爲光，夕見則東指，晨見則西指，在日南北皆隨日光而指。頓挫其芒，或長或短，光芒所及爲災。天文總論曰：兩軍相對，有彗星見，隨彗所指擊之者勝。彗星有行，有止，若行者事小，止者事大，各以其分野占之。荊州占曰：諸彗出，長三丈以上，期一年；四丈以上，期三年；十丈以上，期五年。凡彗星所干曆，百日以上，期三年；百五十日以上，期五年；二百日以上，期七年。彗星見，則敵國兵起，得本者勝。彗星昏見，其國受兵。彗星見久，其災深；見短，其災淺。



彗星出有叛者兵起其國一曰不出一歲天下大水其邦尤甚。運斗樞曰彗星見後曲象旗則王者討伐四方。

孛星 傳曰孛星者惡氣所生爲亂兵以分野言之主兵災。

虹霓 武密占曰虹霓陰陽之氣和則爲雨露怒則爲風雷散則爲虹霓。虹者攻也陰氣攻陽氣也蜺者嚙也災氣傷害於物如有所嚙。一曰樞星之氣散爲虹霓者斗之亂精也斗失則爲之一白。陰陽不和交錯之氣雄曰虹雌曰霓雙出色鮮者

爲虹。暗者爲蜺。若其境有虹從外入飲城中水者。從外順虹攻之勝。屈虹入城中。其城可屠。若城上有黃虹貫城中。主喜。青黑凶。赤白城陷。大戰流血。虹霓有指者。從所指擊之勝。二屈虹東出。其下有大戰。亡城破軍。將死。五虹俱出兵。起期三年。虹霓似日月暈者。必有破軍。先起者勝。虹從井中出。或飲井水者。主兵起。

雲氣占

將軍氣象。將軍之氣上達于天。主名將多謀。猛將之氣如龍。兩軍相當。若發其上。則其將猛銳。



如虎在殺氣中。猛將欲行。動發虎氣。中赤。主有暴  
兵起。吉凶以日辰決之。又猛將之氣。或如烟火  
狀。或如山林竹木。或紫黑色。或上黑下赤。或似黑  
旗。或如張弓弩。或如塵埃頭銳而大。住於營壘軍  
上者。皆猛將氣也。敵軍上氣如困倉。日見而益  
明者。此猛將之氣。不可擊。敵上氣黃白而轉澤  
者。將有盛謀。不可擊。氣青白而高者。將勇。若  
大戰。觀氣前白後青而高者。將弱。土勇。前大後小  
者。將怯。敵氣上黑下赤。氣在前者。將精悍。不可  
當。氣青而踈散者。將怯弱。軍上氣發漸漸如



雲變作山形者將有深謀不可擊。若在我軍上。速戰必大勝。敵上氣如蛟蛇向人。此猛將氣。不可當。若在我軍。戰必大勝。凡赤氣上與天連。軍中有名將。

軍中氣象。凡將帥士卒勇銳。則爲勝氣。可察而行之。凡氣上與天連。此軍士強盛。不可擊。若在我軍。可戰必勝。軍上氣如火光。將帥勇士卒猛。不可擊。在我軍上。速戰大勝。軍上氣如山。或如林木。將士勇。不可與戰。若在我軍上。戰必大勝。軍上氣如塵埃粉沸。其色黃白赤。如旗旌。無風而颺。



此軍欲勝不可擊。在吾軍上戰必大勝。營上氣黃白色光潤重壘者勿與戰。兩軍相當上有氣如持斧向敵戰必大勝。向我主凶。兩軍相當上有氣如蛇舉首向敵者戰必大勝。敵上有氣如足帛者此是雄軍之氣不可攻。若在我軍上戰必大勝。敵上有雲如牽牛未可擊。遙望軍上氣如聞鷄赤白相隨在他軍上主得天助不可擊。若在吾軍上可戰大勝。軍營上有赤黃氣上達于天亦不可攻。凡軍上有五色氣上與天連此天應之軍不可擊。其氣上尖下大其軍旅日增主



士卒銳。軍上氣似堤。覆前後者必勝。若覆吾軍。上急往擊之。大勝。軍上氣銳。色黃白。團圓而潤。澤者。敵將勇猛。其士能疆戰。不可擊。雲如日月。而赤氣繞之。如日月暈狀。有光者。所見之地。大勝。不可攻。敵上氣如雲。常有氣不變者。堅固難攻。凡雲氣如虎踞在軍上者。勝。軍上氣如塵埃。前後高者。將士精銳。不可擊。軍上氣如華蓋。勿與戰。雲如旌旗。如鋒刃。向我者。勿與戰。兩軍相當。敵有氣如飛鳥。徘徊在軍上。或來而高者。兵精銳。不可擊。黑氣出。上有赤氣。臨我軍上。敵強。



我弱。軍上氣如馬首低尾昂者。勿與戰。軍上  
雲如杵。勿與戰。望四方有赤氣。如赤鳥在黑氣  
中。如黑人在赤氣中。如赤杵在黑氣中。如人十  
五五。及狀如旌旗在黑氣中。赤氣在前者。敵人精  
悍不可當。敵上有雲如山嶽。不可擊。有雲長  
如引索在陣前後。或一或四。黑色者主陰謀。青赤  
色急去。月暈有黑雲氣入暈中者。隨所入擊  
之。勝。暈有抱所臨者。勝。日暈相交。居上者勝。虹  
直指順之而擊。可勝。暈有抱有虹。順遶抱者。勝。  
日旁半暈兩頭尖。有大戰。隨所指擊之。勝。



戰陣氣象 氣青白而高者將身大戰 氣如人無  
頭如死人卧如丹蛇赤氣隨之必大戰損將 四  
望無雲獨見赤氣如狗入營其下有流血 四望  
無雲獨見赤雲如立蛇其下有流血 四望無雲  
獨見赤雲如覆船者其下有戰 初出軍日天昏  
溟溟雲氣陰沉寒慘者必戰 若清暢晴和風塵  
不動者不見敵亦不戰 有青氣見軍之旺相方  
者當成交戰不見者不戰 若白虹赤虹見敵上  
其下必大戰流血 赤雲屈盤停住者其下有流  
血 白氣如車入北斗中轉移者下有流血大將



死。雲如農夫耕壠者，兵必大戰。日旁有氣相  
交貫穿，或相背，軍中不和。日有白氣若虹交見  
者，從上擊下，勝無軍而見者，下必流血，兩軍相當  
必交戰。有白虹四五六見者，亦必大戰。日旁  
有一缺，主萬人死；其下兩軍相當，不利先舉。月  
初滿而蝕，有軍必戰。日月有赤雲截之，如大杵  
軍在外，萬人死；其下兩軍相當，不利先舉。

陰謀氣象 白氣群行，徘徊結陣來者，爲他國人來  
欲圖人不備，視其所往，隨而擊之，可得。日月濛  
濛無光，士卒內亂，將軍宜循法度，察有功以自明。

及有兵內發。用嚴刑而伺姦人者勝。天氣陰沉。不雨。晝不見日。夜不見星月。三日以上。陰謀也。將軍宜謹左右及敵人。五日至七日。有謀擁蔽將奪其權。主刑殺事。連陰十日。亂風四起。欲雨不雨。名曰濛主。臣謀上。天氣陰沉。日月無光。晝不見日。夜不見星月。雲障而不雨。此謂君臣有陰謀。兩敵相當。共圖議事。若晝陰。夜月出。上謀下。夜陰。晝日出。下謀上。黑氣如幢。出於營中。上黑下黃。敵欲來求。無誠實之言。九日內宜警備之。黑氣臨我軍如車輪。敵人謀亂我軍。黑氣遊行。中含五



色歸我軍上。敵必合謀來伐。諸國反謀。軍自敗。

守城氣象

凡白氣從城中南北出者。兵不可攻城。

不可屠

城中有黑雲如星。名曰軍精。急解圍去。

有突軍出。客敗。

城中白氣如旌旗者。勝。若赤界。

其邊精銳不可當。

赤雲臨城。有大慶。

黃雲臨。

城大喜慶。

青氣色從城中南北出者。城不可攻。

青色如牛頭觸人者。城不可攻。

城中有氣出。

于東。其色黃。此天城。不可攻。

白氣從中出。青氣。

從北入。及回旋者。軍不得入城。

諸攻城圍邑。過。

旬不雷不雨者。爲城有賢輔。疾去勿攻。

城中氣。

出於外如火煙者主人欲出戰其氣若無極太極者不可攻。城上氣如雙蛇者難攻若前高後卑者攻之可拔後高前卑者不可攻。赤氣如杵形從城中出向外者內兵突出主人勝。城上有雲分爲兩彗狀攻不可得。城上之氣不見於外者不可攻。有赤氣從城上出者內兵勝宜備之。凡城中有諸氣從城中出入吾軍上者敵家氣也。濛氣繞城不入者外兵不得入。日暈有白虹貫之其城可拔。日暈有青氣從中起四出者中勝勿攻。



攻城氣象

凡城上有赤氣黃氣四面繞之。城中大

將死城降。

城上有赤氣如飛鳥。城可急攻。必破。

城上有赤氣。

言如破陣。城可攻。城上無雲氣。

主士卒敗散。

城上營中有赤黑氣。狀如狸皮斑。

及正赤者。軍破。

城上氣如死灰色。及上不出者。

城可攻。

攻城圍邑。其氣如灰。氣出而覆其軍上。

士卒多病。城可屠。

城上氣出。復入城中者。人欲

逃遁。

城上氣聚如樓。見外者。攻之可得。城中

氣起而上赤者。城可屠。

城上有雲如衆人頭赤。

色下多流血。死喪。

氣出南北。城可尅。其氣出



而東城可攻。其氣出而西高城可降。其氣出而高無所止用日久長。有氣從城外而來者兵欲盜攻。凡攻城黑雲臨城者積土固險之象黑者水之氣城池之象我據城敵不可攻敵據城我不可攻。有白氣如蛇來止敵城上者急攻之小緩則失若從其城來指我營者宜急固守。凡攻城有見白氣繞城而入者隨所入急攻之小緩則失。凡攻城若雨濛霧黑日光無色者主勝勿攻。雲氣如雄雉臨陣其下必有降者。濛霧圍城而入城外兵得入。有雲如立人之狀或如立牛



圍城上者。氣如交虹向內者。城可攻。若有雲內  
屈虹。從外入城中。三日內。城可屠。日重暈而白  
虹貫日。圍城客勝。

暴兵氣象

白氣如瓜蔓連結。部隊相逐。須臾罷而

復出。至八九者。急兵至。

白氣如仙人衣。千連萬

結。部隊相逐。罷而復出者。當有千旦兵來。

黑氣

從敵方來。我軍上。敵欲襲我。敵人至。宜備不宜戰。  
敵回。從而擊之。小勝。天色蒼茫。有此黑氣。依日支  
干數內推之。無風雨。則此氣所發之方。必有暴兵。  
日尅時則凶。時尅日則散。此氣所發之方。當有使

人告急一人來則氣一條二人來則氣二條三人來則氣三條若散滿一方則有衆來期至依支于數內而筭有風雨則伏 壬子候四望無雲獨見赤雲如旌旗下有兵起若遍四方者天下盡有兵若四望無雲獨見黑雲極大天下兵起雲半天兵半起名曰天溝三日內有雨災解 敵欲來者其黑氣上有赤雲其下敵必至 雲氣如旌旗賊兵暴起 氣如人色赤白而猝至者是暴兵起有氣如人持刀盾有雲如人坐赤色臨我城邑有卒兵至驚恐須臾去 雲如赤虹有暴兵白虹長



出皆有暴兵流血。有雲如人行止不定有暴兵。赤雲如火者所向之處有兵。天有白氣狀如白布經丑未者天下多兵赤者尤甚。有雲如胡人列陣天下兵起。有雲如疋布且天下者兵起。有雲如狗四五相聚圍者兵起。四方清明獨有赤雲赫然者所見之地有兵。

伏兵氣象 軍上有黑氣渾渾圓長赤氣在其中其下必有伏兵不可擊。兩軍營欲戰或對壘相守望彼軍上有白氣如粉沸。如樓閣狀其下伏兵



萬人不可輕舉。軍行近山林坑谷間，當善防之。旣是伏兵之地，而上有氣者不疑。雲氣紛紛相連，及似蒿草數尺，此以車騎爲伏兵。雲如布蘆之狀，及似蒿菜盈尺許，此以步卒爲伏兵。伏軍之氣如幢節狀，在黑雲中，或如赤杵在黑雲中，或如黑人在赤雲中，勿先動。黑氣出營南，賊逃我後。有伏兵，謹候察之。兩軍相當，有赤氣者，乃伏兵之氣。若前有赤氣，前有伏兵；後有赤氣，後有伏兵。左右亦如之。審察則知伏兵所在。軍上有氣，黑上黑色，中有赤氣，必有伏兵，不可攻。前有黑氣，



後有白氣必有伏兵不可攻 有雲如山林在外者有伏兵。

軍敗氣象 敵上有氣上黃下白名曰善氣所臨之軍欲求和退 敵上有氣囚廢枯散如馬肝色或如死灰色皆爲將敗 敵上氣乍見乍聚不聚如霧始起此敗氣可擊若上大下小士卒日滅 凡軍營上十日無氣此軍必敗有赤白氣乍出卽滅外聲欲戰其實欲退散 黑氣如壞山隨軍上者名曰營頭之氣其軍必敗 軍上氣如火光夜照人軍士散亂 軍上白氣出而半絕者軍欲

敗走一絕一敗再絕再敗三絕三敗在東發白氣者災深。軍上氣如羊形或如猪形此是瓦解之氣軍必敗。敵上有氣如雙蛇或如雙蛇守日疾往攻之大勝。軍上有氣如粉如塵如煙軍欲散。軍上氣五色雜亂東西南北不定者其軍欲敗。軍上氣如群猪在氣中此衰氣擊之大勝。軍上赤氣炎炎降于天衆亂將死。彼軍上有氣蒼蒼須臾而散擊之必勝在我軍上宜固守。軍上有黑氣如牛形或馬形從氣霧中下漸漸入軍名曰天狗下食血主軍散敗。敵上氣如群鳥亂飛。



衰氣也。伐之則我軍勝。望彼軍上氣如垂衣如人相隨擊之可得。望彼軍上氣紛紛如轉蓬者急擊之。望彼軍上氣色如揚灰敵欲退去。氣蒼黑形如粉亂者士卒饑。兩軍相去十里內三里外望彼軍上氣高而前後青白散者此敗軍之氣可擊。雲如覆船如車蓋者其軍必敗。雲氣如人頭臨軍營中戰不勝主流血。敵上雲如群羊如驚鹿必退走宜急擊之。雲如卷席如疋帛亂壞者皆爲喪敗之兆可攻而擒。雲氣蓋道蔽濛晝冥者飯不暇食炊不及熟可急去也。雲如



鷄兔同營者軍敗走。軍上氣黑而卑如倒樓狀。軍移必敗。敵上氣如人卧無手足。或似車徘徊不起者敗。氣如擊牛。凶敗之氣。敵上氣如雙蛇如飛鳥。如決堤如壞屋。如人相指。如人無頭。如驚鹿相逐。如兩鷄相向。皆爲將敗之氣。凡降人之氣。如人皆叉手低頭拜跪。又如人叉手相向而立。又白氣如鳥聚入屯營。連結百餘里不絕。而須臾下者。當有他兵來降。氣如黑山以黃雲爲緣者。欲降服之象。氣青而漸黑者。將欲死。雲氣如人頭者。是將軍失兵之象。散軍之氣如燔生。



草之煙前雖銳。後必退。得歲月利。便擊之。必勝。  
黑氣臨營。或聚或散。如鳥將宿。主敵人畏我下營。  
守定。終必逃遁。逼之大勝。若在吾軍。善撫士卒。  
日暈中有氣如死蛇者。將軍死。兩軍相當。不利先  
舉。日旁有赤雲如垂鍾。其下有將死。日月暈。  
有青氣所臨者敗。軍上有白虹及蜺。屈者敗。  
軍上有白虹及蜺。入營者敗。日暈氣後至先去  
者敗。凡日月暈與氣亦暈。以先至者爲發。以先去  
者爲敗。軍上若有日旁虹蜺及犯逆之戰者敗。  
日暈有四缺。在外軍盡散敗。



氣象雜占

星有兩彗。上似有蓋。下連星。名曰歸斜。歸斜見主。有歸國者。日暈有黃花色。抱珥直光。戴覆黃色。皆喜慶之事。軍中多迅雷。其軍卽罷。京房占曰。赤氣如撒蓋覆軍上。千里內戰有慶。千里外戰有憂。黃氣臨營。東西向並凶。北向吉。赤氣隨日出。軍必有憂。隨日沒。外必告吉。赤氣血色者。流血之象。赤氣如火形見者。臣叛其君。不過三朔。赤氣如龍頭上。又夜光見者。臣離其君。爲客所傷人。之象。黑氣如死人頭。在軍營。



上敵人有所獻且求降許之不許必有戰功。賊  
士卒主多死。黑氣如牛頭龍馬蛇變化。精  
察之。夷兵欲敗中國宜遣伺候。凡出軍向東伐  
而有白雲從西來因隨而擊之勝。若有赤雲從東  
來逆軍者敵勝我軍當敗。急宜屯守他倣此。黑  
氣如積土在我軍上敵來襲我我必堅守經月敵  
必離離而後戰大勝。凡對敵在東方白雲東去  
而有雲又東來相迎者或雲已去而有風隨之所  
望如龍虎之狀者若在我軍皆大勝。雖雲從而風  
逆者亦不可戰。凡有雲氣橫來者兩軍未合急



先伏止。當有通將。若黃氣在吾軍者。急令舉兵。不  
速戰。士卒俱必罷。軍吉。凡兩軍相當。彼軍上不  
赤氣。狀如疋布。廣長數十丈。其下色黃白。必有背  
叛之軍。晝見在臣。夜見在兵。宜備之。凡被圍。平  
旦視圍上。氣鬱鬱如火光芒者。其方有救。至無者  
無救。軍行有白氣如虹者。軍大驚。宜備之。若  
黑氣南北如陣。國將有憂。不然有大水爲害。白  
雲白氣。極天南北如陣。有慶。黑雲東西如陣。有  
憂。若天氣蒼茫。而東西極天移目不動者。爲憂  
深。此氣以戊巳日出爲災。赤雲臨圍上。東西如



陣者。兵敗。凡霧春以甲乙寅卯日。氣色青。出東方。利中方。客勝。凡霧夏以丙丁巳午日。氣色赤。利西行。客利。主人凶。凡霧四季以戊己辰戌丑未日。氣色黃。利北行。客利。主人內亂。凡霧秋以庚辛申酉日。氣色白。利東行。利爲客。先舉兵勝。後舉兵敗。凡霧冬以壬癸亥子日。氣色黑。利南行。凡興軍動衆。雲氣亂壞。大風將至。視所從來避之。雲甚潤而厚。大雨必暴至。四始之日。有黑氣如陣而重大。多雨。氣若霧非霧。著衣冠而濡見。則其城帶甲而趨。日出沒時。有雲橫截之。白者。



喪黑者驚三日內有雨則災解。雲氣如鬼臨軍。

營中其軍士死亡。天有青氣入營者兵驚恐。

天有赤氣入營者兵暴驚。天有黃氣入營者有

兵和解。天有白氣入營者兵強。天有黑氣入

營者大王疾病且兵衆相殘宜急移營。有雲如

蛟龍所見處將軍失魄。有雲如日月暈赤色其

國凶青白色有大水。有雲狀如龍行國大水流

亡。凡遇四方盛氣勿向之戰。甲乙日青氣在東

方丙丁日赤氣在南方庚辛日白氣在西方壬癸

日黑氣在北方戊巳日黃氣在中央四季之戰當



避此吉。逆之必敗。甲乙日平旦。所向有白雲。不可  
攻。丙丁日日中。所向有黑雲。皆爲堅敵。不可攻。他  
倣此。赤氣如火者。叛其君。赤氣加西方者。客勝。  
加北方者。客敗。加東方者。和。解。不鬪。加南方者。軍  
還。天下安。他倣此。凡天見五色雲氣。望東西南  
北。至于午卯酉。若百步千步十丈至百丈而來。如  
車道行者。若與日辰相尅者。大鬪。不相尅者。不戰。  
旺氣所臨。有天命。爲兵強。相氣所臨。爲戰勝。死氣  
所臨。爲喪敗。囚氣所臨。爲拔圍降敵。休氣所臨。爲  
兵罷無功。各以旺相休囚言。

行軍災異雜占

將帥床帳及棹無故自動者主遠行如無遠行下筮  
謀之將帥衣服無故血污下欲謀上宜施恩警備  
將帥槍刀劍箭無故出匣主鬪凡軍馬旗幟  
無故倒折主大將失位鼓角刀劍自鳴者陰謀之  
應將帥目動耳鳴及無故自驚并不覺咄嗟疑  
淚者並是下人起念生謀宜防之鼓忽自鳴主  
敵人來軍中馬生角下謀上將帥騎馬之次  
無故回頭齧人靴鞢觸人衣裳者主下有陰謀已  
成防之大將門廳自鳴者主下謀上鴉鵲食



雉等飛入帳幕中無聲者必有下傷害。大將軍  
食次其匙筯自動者其下行毒。狗無故上床主  
下謀上。蛇入廳及帳幕中屈盤勿損之有陰謀  
相助。將帥睡中高語自覺驚寢計謀必有神助  
之應。凡城郭中及營砦中木上有鳥作巢忽樹  
巢折卸鳥去者兵大凶宜別下城砦。若夢得大  
魚戰大勝。若夢聞雷劈破大賊急進兵大勝。  
夢見日暈有下人謀上。夢見霜雪軍將失勢夏  
月大凶士卒逃散。夢見搥鼓大鳴大勝小鳴小  
勝。夢見大水泛漲軍陣必勝。夢見食泥土必

收城郭。夢見自身病必加爵。困者甚吉。傍有哭聲必凶。夢見吐衄者有病出也。夢見水乾得小魚半死半生者主口舌。五日內當戰不勝。夢見牙旗折倒者軍威失利。夢見走馬快利戰勝。行遲者凶。夢見身入井者被牢獄厄。宜撫士卒。夢見人遺刀劍戰必勝。夢見身飛颺者戰勝。名聞千里。夢見天道中走及大戰者有戰。凡爲將帥領士卒。察淵奧。測成敗。參諸天道。不可不知。常視神光。可見吉凶。欲交戰之時。當以手隱眼。角則見其色。若見光色。各以五行言之。黃光者必



獲敵人金帛赤光者大喜白光者兵刃相交主流  
血青光者主有憂黑光者主大憂凡出軍忽見  
狼虎在軍前後吼哮及入軍營中者不出五七日  
有戰先衝突者大勝虎豹獸入軍營反傷害人  
者主大賊至鹿獐鬼之類入軍營皆主營空急  
移營吉軍行營幕已成忽見虎從中入我營走  
過軍中者急移必敗猛獸至軍營敵人必勇必  
有突入我營之機或有姦覘我軍慎之兩軍相  
當飛鳥入我城壘營陣者大凶急移營陣吉兩  
軍相當有虎狼豺狸走入其中或圍繞軍營悲鳴



者將有凶。必大敗。宜撫士卒。翼日而戰。吉。若左彼  
軍中鳴。急進兵攻戰。軍中或有豺狼及雉飛入  
營者。皆凶。急修德。揚武吉。營陣前後左右有狐  
狸向軍四面鳴者。戰必敗。宜固守。軍營城壘往  
往捉得狐狸者。敵人來戰。必破之。狐狸麋鹿之  
類入軍營者。不出五日。主軍驚。可移軍。候防。候必  
得敵人。凡野獸入軍。皆與將爲應兆。兩軍相當。  
禽獸從將軍命德上來。并歲月日德上來者。皆吉。  
慶。若從將軍命刑。及歲月日刑上來者。主失位有  
凶之兆。軍行馬無故食砂石者。失應兵。強戰勝。



也。軍中衆馬晨夜鳴者。當有暴兵至。主士卒戰敗之兆。急防之。

人物雜占

婦人好爲小服。兵革動。人衣服尚寬。時平人吉。

人死復生者。兵起。人生牛。兵起。小兒爲旗旛。

戲者。不二年。戎馬興。小兒作兵馬戰鬪。不出一。

年。兵起。小兒爲歌謠戲語。善惡如其言。人尚。

胡服。戎虜相侵。人尚彩畫衣。主兵起。龍飲軍。

中水。國虛。龍冬見于道。或闔邑中。其地有戰爭。

凡行軍。將馬前忽見大蛇攔道。宜便住軍。不可。

連亦不可戰。有鄰人來驚我軍。軍行忽見蛇交者。主將凶。軍行前見赤蛇者。急警備。必有交戰。軍行見蛇道中入水者。得敵便利吉。軍營既成。有大蛇入營求食者。營欲荒。急移營吉。蛇集道上及郡邑中。主急兵。軍營地多蛇蟲。散敗之兆。軍行見蛇在地。前有伏兵。鵲鵲鴉鴿巢軍營官室。不出三年。夷狄來侵。鴻雁之屬來翔營府之上。三日內群謀將起。大兵且至。鳥巢城上城下。不出一年。其城被圍。鳥不巢木。多在屋室上。此謂失常。衆鳥集水上有兵革。蝗蟲飛從



他處來忽死。不出三日。兵大起。軍在野。蜂衆集。營壘軍散敗。蜂蝶衝軍。有賊衝突。軍行逢蜂蝶。赤色者。必交戰。并伏兵。軍營中。卒見蜂鳴。多聚者。急移營。主士卒逃散。軍在野。有飛鳥不知名。入軍幕中。凶。宜移軍。無災。衆鳥集。將軍旗上有憂。鳥集鼓上。將軍病死。群鳥夜鳴。郡邑有憂。大鳥殺物于軍前後。有大功。衆鳥徘徊于軍上。必有暴兵。不出三日。群鳥相迎于軍中。有暴兵起。若戰有功。衆鳥在軍營上交飛相擊。其下必有兵戰。衆鳥翔起障日。群下有謀。宜警備之。



衆鳥宿城上其頭向內城必被圍。軍出郊野有鳥迎之是謂受福敵人降伏。兩軍相向有飛鳥來而漸高有銳兵來相攻宜備之。群鳥集城上及軍營中鳴噪其地流血。白鵲白鴒此是兵災不宜攻戰。群鳥集于軍營前後凶。有群鵲所向隨鵲攻之大勝。衆鳥起軍左還泊軍右賊有伏兵宜候之。凡野禽入營敵來宜備之。衆鳥飛舞于市邑有兵。鳥雀自死屋上或軍營內其下地凶。有大鳥逆行陣上主兵至。衆鳥四面鳴軍上有暴戰。野鵲衆多先水後旱冬有兵。



雉相戲軍砦中及鬪其將憂。鷄不卵而生子及異其形。皆主有兵。鷄聚鳴主大兵。六畜能言善惡如其言。亦爲大水。軍行忽豺狼之類猖獗來衝軍凶。熊羆及害人獸入營中賊欲至。狐貉叫鳴。回走軍壘中。軍敗將辱。猿猴入軍壘中。內有奸謀。兵起。狐狸走入軍營中作巢其營主空。野獸突入我軍旅中。主其軍分。猛獸在軍前驅。如引軍者。主有城降。獺入人家及屋上。主憂兵。麋鹿入軍營。兵敗散。急去之無害。狐狸向彼軍鳴者。彼軍敗。宜急擊之。若鳴于我軍。宜撫。



士卒。鬼上城邑必空。軍行卒有白兔。破軍殺將。牛生兩頭。其軍分。牛生犢。人面獸身。兵起。牛夜鳴。有暴兵。犬群會于街衢。主有賊兵。軍在野及營中。馬食砂石。戰勝。軍中安營畢。忽有牛馬入我軍中。戲。軍敗。驢馬相追。戲于軍門。兵罷。軍行路中。見赤鼠在軍前。良久不去。必有伏兵。須警備。軍行野宿。鼠咬旗鼓者。賊欲來斫營。軍行營陣未罷。有鼠作雄鷄聲者。行營凶。軍中夜被鼠穿作地孔者。移營吉。營壘中晝夜見鼠走者。五日內。主有水災。鼠巢于木。主大水。



鼠聚舞于道。主兵。鼠無故皆夜去。邑有兵。  
鼠咬兵伏。主被傷。鼠啮人足。有敗亡。鼠群行。  
不畏人。晝爲饑。夜爲兵。鼠聚軍營中。軍破移營。  
無災。數小鼠出見軍中將有叛者。軍在野營。  
中。忽見龜。兵散亡。食器中有血。宜奔之。衣服無  
故腥臭者。宜奔之。衣服無故裂有聲者。勿宜服。

### 風雨賦

高明上覆。日月星辰。沉潛下載。風雨雷神。占斗光之  
明暗。辨月色之初新。魁畔黑雲。見沾滋于當夜。魁星  
前四星是也。若黑罡前黃氣。知潤澤以來晨。罡北斗  
雲掩斗口是夜雨



是過掩映而三日北斗雲過掩獨溟濛而半旬斗間

星雲蔽三戊巳六龍若魚行而大灑戊辰巳巳各日

占日下夜占斗若雲氣蒼潤如斗間五色如龜動以

長津斗間五色雲氣如類南天而炎火同申岳以飄

塵南天者赤色氣中岳者黃色氣斗間赤氣主旱主

能亥子主癸杓前白氣而大遭風雨杓北斗後節內

丹霞而甚益農人旬交節氣日早見六甲晴空一句

竭潑凡一舉第一句甲日無雲氣如出五行逐面雲

看出何方定雨如東方應甲乙日雨其餘依此青雲

甲乙雨紅雲丙丁雨黃雲戊巳雨白雲庚辛雨黑雲

壬癸日雨五色逐卯日同甲四方之氣象為因與六

方面而起雨也



甲日旦夕滋蒼諸干之期程立變平日旦占看黑雲在何方如東方應甲

乙日之類斷紫烏白兔降未升而雨霑日紫月白素日丹主有陰雨

蟾升未降而炎旱日白月赤主大炎旱陽碧陰綠未交而景色

將寒天氣下降地氣未升日色青月色綠是二氣不交將寒之兆奇黑耦青未密

而虹霓欲見奇者日耦者月也日黑月青將雨不雨而虹見若乃重占卯日

雲聚中央寒風冽土樹折四方雨瀉傾頻無之則別

生災異攢興兵賊有之則大起凶殃甲卯日如前天

止災殃亦必主盜此五音之宮羽子午時為宮卯酉時為羽辰戌時為商巳亥時為角丑未寅申時為徵也又土為宮水為羽

商巳亥時為角丑未寅申時為徵也又土為宮水為羽

羽木為角火為徵金為商如徵日徵風時加丑未寅申時加辰戌有兵起羽日羽風時加卯酉有雨水裁



六義之柔剛

六義者六情也如寅午日為廉貞風從南來主喜慶樂事巳酉為寬風從西來

主酒食樂事丑戌為公風在西南來主報事善相通和悅之事申子日為貪狼風從北來主侵奪財貨賊

盜兵起寅卯日為陰風從東來主七日有陰賊入界偷劫營寨之事辰未日為奸邪風從東北來七日內

有虛驚驚姦非事如風清不寒事若如昏濁破屋拆木則凶也

壬子至丁各轄三朝

高燥則雲藏計數

壬子癸丑甲寅乙卯丙辰丁巳每

有雲氣濃黑在斗上下左右則戊午巳未庚申三日晴餘皆倣此古之丙

日內若無雲氣晴明者此三日晴餘皆倣此古之子終辛每管五日低濃則雨遍諸鄉連窺天漢蛇經

而霧集雲屯累顧銀河猪越而風調雨順

天漢銀河即天河也

其雲黑潤如猪蛇形經越來往無雲掩映當旬之草

大河間主當時期日以占必雨木不滋有氣侵凌逐限之田園益潤

言天河中及五卯六甲雲氣利



來如前黑牛夜半如龍在震以辰期。癸丑日夜半黑

震位辰青龍辰前似馬當離而午信。辰日早有雲氣狀如馬形在離

位主午月初兩曜青黑潤明旬當數雨黃色乾晴。兩

日月也每月初占日月如青黑旦候孤光雲帶中央

而不動日高三丈雨施四面以頻行。孤光日光也日出時雲蔽日不

見不散移主日朝視東方積土之雲形便瀉暮窺西

上累蓋之氣象尋傾晨候北方雲多黃黑曉望南行

雨雷立見躍躍猪氣山奔而七子之期。七子應在

鬱離風乾去以八辰之索。八辰亦雲帶橫列寅卯為

甲乙之名日位次當辰巳作丙丁之色午未之間見



戊巳日以無差坤申之上行雲庚辛日而不易若當

炎旱熒惑少退于河津火星守天河及河或遇霖霍

辰象曜繁于漢泊天河星多兼以天威電凍神怒雲

雲漫洒輕吹遠邇而仁君惠重君正臣忠先風後雨

以詳審上驕下誥始雨終風而禍占填逆入河法令

急而淋潦填星土星逆行河也熒惑犯木政理乖而旱炎熒惑火星

也若凌犯辰星主旱明陰陽開闔之節達璇璣運行之數四仲

加變朝中夕半以興雲四仲子午卯酉也凡四仲年

日青黑明滙必雨朝中日六壬發傳能水干支而致

午時也久半夜子時也雨支干兩位非其所以無多月宿十精當是方而遍



溥

春三月丙丁夏三月戊巳秋三月壬癸冬三月甲乙日土王用事時庚辛日各月宿十情日不

無雲氣但逢此日必大風雨或陰雨不應是

土王用事時庚辛方應如春三月丙丁應也

入起風霧以連天

金水二星初出初

畢月相逢布雲

雷于下上

月犯畢星主雨

銅雀屏氣池枯而徵鳥超張

銅雀

鳴則五穀熟屏氣不鳴也主旱又蛛蛛石燕翔翔川

溢而商羊鼓舞

石燕藻名飛則主雨商羊戴君之德一足鳥舒翅跳舞上水灾

五徵不足以維新任相之賢十義無虧而效古尊天

貴地徵秘法以推誠敬鬼重神握玄機而定譜

一查四七風雨歌雷門掛榜二十四款火大率不

出前賦但以此賦熟讀細玩而定五行生克之理

則無有不應者故餘書畧而不錄